

Penyasaran subsidi diesel

# Kerajaan sedia perbaiki kelemahan


PM bersikap terbuka terima sebarang cadangan penambahbaikan bagi baiki kekurangan

Oleh Nur Izzati Mohamad  
bhnews@bh.com.my

**Bukit Mertajam:** Kerajaan sedia memperbaiki kelemahan yang dikenal pasti dalam pelaksanaan penyasaran subsidi diesel yang dilaksanakan buat julung kali di Malaysia.

Mengakui bersikap terbuka menerima sebarang cadangan untuk menambahbaik langkah merasionalisasi subsidi, Perdana Menteri, Datuk Seri Anwar Ibrahim, berkata apa yang dilakukan ketika ini adalah percubaan awal dan semestinya berdepan beberapa kekurangan.

"Saya ambil sikap terbuka, kalau ada beberapa kelemahan, maklum, kita betulkan. Ini percubaan awal yang tentunya menghadapi sedikit sebanyak masalah, saya tidak nafikan tetapi cerca seolah-olah kerajaan zalim, itu tidak boleh," katanya kepada pemberita selepas menghadiri Program Korban Perdana,



Anwar bersama penduduk bergotong-royong memasak gulai ketika hadir Korban Perdana bersama Perdana Menteri di Masjid Jamek Cerok Tokun, semalam.

(Foto Danial saad/BH)

di Masjid Jamek Cherok Tokun, di sini, semalam.

Anwar yang juga Menteri Kewangan berkata, kerajaan dan pemimpin-pemimpin sebelum ini juga bersetuju dengan penyasaran subsidi diesel kerana ia merupakan langkah yang betul bagi mengelakkan pembaziran subsidi, sekali gus memulangkan penjimatan kepada rakyat.

Katanya, langkah itu penting

bagi mengelak ketirisan dana negara walaupun menyedari banyak pihak tidak dapat menerima kenaikan bahan api.

"Kita baca liputan media ramai tidak dapat menerima kenaikan harga diesel, maka kita nampak pelanggaran dari segi peraturan diesel.

"Subsidi ini untuk orang miskin, petani, nelayan dan pekebun kecil atau pihak pengendali bas

sekolah dan pengangkutan awam tetapi terlalu nyata orang yang mencerca kita," katanya.

Terdahulu ketika berucap, Anwar berkata, penyasaran subsidi dilakukan kerana ia dinikmati 3.8 juta warga asing sedangkan yang membayar cukai adalah rakyat.

"Subsidi kita bayar, cukai rakyat Malaysia bayar tetapi subsidi diesel warga asing dapat. Per-

niagaan haram guna diesel kita.

"Dua hari lalu, semua bas pelancongan dan syarikat pelancongan dari Singapura nak naik harga (tambang) sebab tak dapat subsidi.

"Maknanya, selama ini berpuh tahun subsidi kita pergi ke syarikat Singapura dan ada yang pergi ke kapal nelayan Thailand, diesel dicuri di sana sini, bocor banyak.

"Bagi penanaman padi, traktor kita akan bagi (subsidi) tetapi kita tidak boleh bagi dekat orang kaya," katanya.

## Penurunan harga telur

Menyentuh penurunan harga runcit telur ayam, Anwar berkata, ia langkah awal bagi mengembalikan hasil penjimatan penyasaran subsidi kepada rakyat kerana ia merupakan makanan yang paling banyak digunakan oleh rakyat di peringkat bawah.

"Kita buat kajian (didapati) keluarga paling banyak gunakan ialah telur, keluarga sederhana, miskin ambil telur empat biji sehari.

"Oleh itu, kita bincang dengan syarikat dan tanya untung serta turunkan sedikit harga telur tetapi tak rugi (bagi syarikat) dan kalau ada cara-cara yang lain, saya boleh ikhtiarkan," katanya.

Kelmarin, Anwar mengumumkan harga runcit telur ayam gred A, B dan C di seluruh negara diturunkan 3 sen sebiji.